

**BOSNA I HERCEGOVINA  
FEDERACIJA BOSNE I HERCEGOVINE  
VLADA**

**NACRT**

**ZAKON  
O IZMJENAMA I DOPUNAMA ZAKONA O VODAMA**

**Sarajevo, decembar 2017. godine**

# ZAKON O IZMJENAMA I DOPUNAMA ZAKONA O VODAMA

## Član 1.

U Zakonu o vodama ("Službene novine Federacije BiH", broj 70/06) u članu 4. tačka 4. mijenja se i glasi:

"4. „rijeka“ znači tijelo kopnene vode, koje većim dijelom teče površinom tla, ali može dijelom toka teći i ispod zemlje."

U članu 4. u tački 27. riječi "ako je ukupna zahvaćena količina veća od 10 m<sup>3</sup> na dan" brišu se.

U članu 4. tač. 36. i 41. mijenjaju se i glase:

"36. „otpadne vode“ označavaju sve potencijalno onečišćene tehnološke, sanitarne, oborinske i druge vode koje su promijenile svoje prirodne, fizičke, hemijske ili biološke osobine rezultatom ljudskih aktivnosti;"

"41. „inundacioni pojas“ označava zemljište između riječnog korita i vanjskog ruba pripadajućih mu regulacijskih i zaštitnih vodnih objekata uključujući i pojas zemljišta potrebnog za njihovo redovno održavanje, kao i zemljište uz vodotoke koje je dokumentima prostornog uređenja rezervisano za građenje regulacijskih i zaštitnih vodnih objekata i vještačke retenzije u granicama utvrđenim dokumentima prostornog uređenja;"

U članu 4. iza tačke 42. dodaju se nove tač. 43., 44., 45., 46., 47., 48., 49., 50., 51., 52., 53., 54., 55., 56., 57., 58., 59., 60., 61., 62., 63., 64., 65., 66., 67., 68., 69., 70., 71., 72. i 73. koje glase:

"43. "**poplava**" označava privremenu pokrivenost vodom zemljišta koje obično nije prekriveno vodom. Izraz obuhvaća poplave koje uzrokuju rijeke, bujice, privremeni vodotoci, poplave morskom vodom u obalnim područjima. Pojam ne obuhvaća poplave iz sistema javne kanalizacije za odvođenje urbanih otpadnih voda;"

44. "**poplavni rizik**" označava kombinaciju vjerovatnoće pojave poplave i potencijalnih štetnih posljedica uslijed pojave poplave po zdravlje ljudi, okoliš, kulturnu baštinu i privredne aktivnosti;"

45. "**jezero**" označava tijelo stajaće kopnene površinske vode;"

46. "**dobro stanje površinske vode**" označava stanje nekog tijela površinske vode kada se i njezino ekološko i hemijsko stanje ocjenjuju barem kao "dobro";

47. "**dobro stanje podzemne vode**" označava stanje nekog tijela podzemne vode kada se i njezino količinsko i hemijsko stanje ocjenjuju barem kao "dobro";

48. "**dobro ekološko stanje**" označava stanje nekog tijela površinske vode, klasifikovano u skladu s odredbama podzakonskog propisa iz člana 43. stav (1) tačka 2. ovog zakona;"

49. "**dobar ekološki potencijal**" označava stanje znatno promijenjenog ili vještačkog vodnog tijela, klasifikovano u skladu s odredbama podzakonskog propisa iz člana 43. stav (1) tačka 2. ovog zakona;"

50. "**dobro hemijsko stanje površinske vode**" označava hemijsko stanje površinske vode koje se traži da bi se postigli ciljevi zaštite okoliša, određeno u skladu s propisom iz člana 43. stav (1) tačka 2. ovog zakona, odnosno da bi se postiglo hemijsko stanje tijela površinske vode u kojem koncentracije zagađujućih materija ne prelaze utvrđene standarde kvaliteta okoliša;"

51. "**dobro hemijsko stanje podzemne vode**" označava hemijsko stanje nekog tijela podzemne vode koje zadovoljava uslovima definisanim propisom iz člana 43. stav 1. tačka 2. ovog zakona;"

52. "**raspoložive zalihe podzemne vode**" označava višegodišnji prosjek ukupnog prihranjivanja vodnog tijela podzemne vode umanjen za višegodišnji prosjek proticaja potreban za postizanje ciljeva ekološkog kvaliteta povezanih površinskih voda, utvrđen propisom iz člana 43. stav (1) tačka 2. ovog zakona, kako bi se izbjeglo svako znatnije pogoršanje ekološkog stanja tih voda, i nanošenje znatne štete povezanim kopnenim ekosistemima;"

53. **"dobro kvantitativno stanje"** označava stanje podzemne vode definisano propisom iz člana 43. stav (1) tačka 2. ovog zakona;
54. **"zagađenje"** označava direktno ili indirektno unošenje materija ili toplote u zrak, vodu ili zemljište izazvano ljudskom aktivnošću, što može biti štetno za ljudsko zdravlje ili kvalitet vodnih ekosistema ili kopnenih ekosistema direktno zavisnih o vodnim ekosistemima, koje dovodi do štete po materijalnu imovinu, šteti vrijednostima okoliša ili drugim legitimnim oblicima korištenja okoliša ili na njih utiče;
55. **"ciljevi zaštite okoliša"** označava ciljeve utvrđene u čl. 30. do 37 ovog zakona;
56. **"standard kvaliteta okoliša"** označava koncentraciju određene zagađujuće materije ili grupe zagađujućih materija u vodi, sedimentu i/ili bioti, koja se ne smije premašiti, radi zaštite ljudskog zdravlja i okoliša;
57. **"vodne usluge"** označava sve usluge koje za domaćinstva, javne ustanove ili bilo koju privrednu aktivnost osiguravaju:
- a) zahvatanje, akumuliranje, skladištenje, prečišćavanje i distribuciju površinske ili podzemne vode,
  - b) prikupljanje i prečišćavanje otpadnih voda koje se zatim ispuštaju u površinske vode;
58. **"korištenje vode"** označava, uz vodne usluge, i ostalo korištenje voda iz čl. 44. i 46. ovog zakona zajedno sa bilo kojom drugom aktivnošću koja ima značajan uticaj na stanje voda. Pojam „korištenje voda“ u smislu ove tačke primjenjuje se samo za provedbu poglavlja IV ovog zakona i izradu ekonomske analize korištenja voda koja je sastavni dio plana upravljanja vodnim područjima;
59. **"granične vrijednosti emisija"** označava masu, izraženu u odnosu na određene posebne pokazatelje, koncentraciju i/ili nivo emisije, koja se ne smije prekoračiti u jednom ili više razdoblja. Granične vrijednosti emisija mogu se također odrediti za određene grupe ili kategorije supstanci, posebno one navedene u propisu iz člana 55. stav (1) ovog zakona;
60. **"kontrola emisija"** označava mjere kojima se zahtijeva specifično ograničenje emisija, na primjer graničnu vrijednost emisije, ili drugačije određuju ograničenja ili uslove posljedica, prirode ili drugih karakteristika emisije ili uslove rada koji utiču na emisiju;
61. **"monitoring"** je proces višekratne kontrole jednog ili više pokazatelja kvaliteta i količina voda;
62. **"ES (ekvivalentni broj stanovnika)"** znači organsko biorazgradivo opterećenje od 60 g O<sub>2</sub> dnevno, iskazano kao petodnevna biohemijska potrošnja kiseonika (BPK5);
63. **"estuarij"** označava prijelazno područje na ušću rijeke, između kopnenih voda i obalnih morskih voda;
64. **"kvantitativno stanje"** označava stepen do kojeg se na neko tijelo podzemne vode utiče direktnim i indirektnim zahvatanjem;
65. **"adekvatno prečišćavanje otpadnih voda"** podrazumijeva prečišćavanje urbanih i/ili tehnoloških otpadnih voda bilo kojim procesom i/ili načinom ispuštanja kojim se omogućava da vodna tijela u koja se ispuštaju otpadne vode zadovoljavaju standarde kvalitete okoliša (SKO) i u skladu sa propisom iz člana 43. stav (1) tač. 1.,2.,3. i 6. ovog zakona i okolišne ciljeve propisane za to vodno tijelo u skladu s čl. 30. do 37. ovog zakona;
66. **"javni kanalizacioni sistem"** označava sistem vodnih objekata iz člana 14. stav (1) tačka 4. ovog zakona kojim se prikupljaju i odvode urbane otpadne vode, a kojim upravlja operater;
67. **"sistem individualne odvodnje"** čine objekti odvodnje otpadnih voda iz pojedinačnih objekata na područjima gdje nije izgrađen javni kanalizacioni sistem, kojima se vrši: a) odvodnja i ispuštanje sanitarnih otpadnih voda putem septičkih jama kod kojih se razlikuju tehnička rješenja ispuštanja prelivnih voda iz jame u površinske vode, odnosno indirektno u podzemne vode (putem upojnih bunara) i sl. shodno odluci o odvodnji ili b) odvodnja i prikupljanje sanitarnih otpadnih voda ili tehnoloških otpadnih voda nakon predtretmana u sabirnu jamu odgovarajuće zapremine za privremeno prihvaćanje čiji sadržaj se periodično prazni, shodno odluci o odvodnji;

68. **"tehnološke otpadne vode"** su sve otpadne vode koje nastaju u tehnološkim postupcima i ispuštaju se iz objekata u kojima se obavlja bilo kakva industrijska ili privredna aktivnost, osim sanitarnih otpadnih voda i oborinskih voda;

69. **"urbane otpadne vode"** označavaju otpadne vode koje su prikupljene javnim kanalizacionim sistemima iz domaćinstava ili mješavinu tih voda sa tehnološkim otpadnim vodama i/ili oborinskim vodama;

70. **"sanitarne otpadne vode"** označavaju otpadne vode iz stambenih objekata, ugostiteljstva, ustanova, vojnih objekata i drugih neproizvodnih djelatnosti i uglavnom potiču od ljudskog metabolizma i aktivnosti kućanstava;

71. **"oborinske onečišćene vode"** su otpadne vode koje nastaju ispiranjem oborinama s površina: autocesta, aerodroma i sličnih prometnih objekata, benzinskih pumpi, radionica za popravak vozila sa nenatkrivenim radnim prostorom.

72. **"aglomeracija"** podrazumijeva područje na kojem su stanovništvo i/ili privredne aktivnosti dovoljno koncentrisani da se urbane otpadne vode mogu prikupljati i sprovesti do postrojenja za prečišćavanje otpadnih voda ili do krajnje tačke ispuštanja;

73. **"efluent"** je jedinstven naziv za otpadne vode koje se prečišćene ili neprečišćene ispuštaju u javni kanalizacioni sistem ili u površinske vode i otpadne vode javnog kanalizacionog sistema koje se, prečišćene ili neprečišćene, ispuštaju u površinske vode."

## Član 2.

U članu 5. u stavu (2) u naslovu (A) na vodnom području Save, podnaslov Vještačke akumulacije, tačka 5. Župica briše se.

U članu 5. u stavu (2) u naslovu (B) Na vodnom području Jadranskog mora, u podnaslovu Vodotoci, iza tačke 8. dodaje se nova tačka :

9. Rakitnica

U članu 5. u stavu (2) riječi: "Sve preostale vode su vode II. kategorije." brišu se.

Iza stava (2) dodaju se novi st. (3) i (4) koji glase:

„(3) U površinske vode I. kategorije spadaju i površinske vode koje presijecaju državnu granicu Bosne i Hercegovine sa susjednim državama, čiji popis za vodno područje utvrđuje Vlada Federacije na prijedlog nadležne agencije za vode. U ovu listu se uključuju i vještačke akumulacije koje presijeca entitetska linija između Federacije BiH i Republike Srpske ili Federacije BiH i Brčko Distrikta BiH, ako to nije u suprotnosti sa propisom kantona.

(4) Sve preostale vode su vode II. kategorije.“

## Član 3.

U članu 7. stav (4) briše se.

## Član 4.

U članu 9. iza stava (4) dodaje se novi stav (5) koji glasi:

„(5) Obaveze pravnih lica i institucija kojima je preneseno pravo upravljanja javnim vodnim dobrom iz stava (3) ovog člana uključuju: održavanje, davanje u zakup, čuvanje, vođenje evidencija i ažurnog upisa javnog vodnog dobra u zemljišne knjige, izvještavanje vlasnika o stanju javnog vodnog dobra, ukoliko aktom o prenosu nije drugačije utvrđeno.“

## Član 5.

U članu 10. dosadašnji stav (4) mijenja se i glasi:

„(4) Javno vodno dobro može bit predmet dodjele koncesije u skladu sa propisima o koncesijama .“

Dosadašnji stav (4) postaje stav (5).

## Član 6.

U članu 11. u stavu (1) tačka 2. briše se.

U članu 11. u stavu (2) tekst: "na osnovu donesenog rješenja, ili odluke iz stava (1) ovog člana" briše se.

## Član 7.

U članu 12. u stavu (1) u tački 4. riječ: "prirode" zamjenjuje se riječima: "prirodnog i kulturno-historijskog naslijeđa."

U članu 12. u stavu (1) iza tačke 7. dodaju se nove tač. 8. i 9. koje glase:

"8. postavljanje ili gradnja privremenih objekata za sport, rekreaciju, ugostiteljstvo i turizam i to: šetnice, vidikovci, trim staze, sportski tereni bez tribina, dječja igrališta, pristaništa, splavovi i ljetne bašte;

9. rekonstrukcije postojećih objekata izgrađenih u skladu sa uslovima iz propisa o vodama i propisa o građenju koji su važili u vrijeme njihove izgradnje."

U članu 12. iza stava (2) dodaju se novi st. (3) i (4) koji glase:

"(3) U slučajevima zahvata na javnom vodnom dobru iz stava (1) ovog člana za koje je potrebno proglašenje javnog interesa odluku, na prijedlog korisnika, donosi Vlada Federacije za javno vodno dobro u vlasništvu Federacije, vlada kantona za javno vodno dobro u vlasništvu kantona i općinsko vijeće za javno vodno dobro u vlasništvu općine u skladu sa članom 9. stav (3) ovog zakona.

(4) Odlukom iz stava (3) ovog člana javno vodno dobro ne mijenja status."

## Član 8.

U članu 25. st. (1) i (2) mijenjaju se i glase:

„(1) Za upravljanje vodama unutar teritorije Federacije donose se planovi upravljanja vodama za vodno područje rijeke Save i vodno područje Jadranskog mora na način propisan ovim zakonom.

(2) Plan upravljanja vodama iz stava (1) ovog člana obavezno sadrži:

1. Opći opis karakteristika vodnog područja;
2. Sažeti prikaz svih značajnih pritisaka i uticaja ljudske djelatnosti na stanje površinskih i podzemnih voda;
3. Identifikaciju i karte zaštićenih područja;
4. Kartu mreže monitoringa te prikaz rezultata monitoringa kojim se prati stanje voda;
5. Ciljeve upravljanja vodama;
6. Pregled ekonomskih analiza korištenja voda;
7. Prikaz programa mjera kojim se osigurava dostizanje ciljeva zaštite okoliša iz čl. 30. do 37. ovog zakona;
8. Pregled sadržaja svih detaljnijih programa i planova iz oblasti upravljanja vodama, okoliša i vodnih usluga na vodnom području;
9. Izvještaj koji obuhvaća opis aktivnosti i rezultata učešća javnosti u postupku izrade plana;
10. Listu institucija i način dobivanja dokumenata na osnovu kojih je izrađen plan;
11. Pregled međunarodnih obaveza koje je preuzela Bosna i Hercegovina, koje se odnose na upravljanje vodama te način njihovog izvršavanja.“

## Član 9.

U članu 26. st. (1), (2) i (3) mijenjaju se i glase:

„(1) Radi postizanja ciljeva zaštite okoliša iz člana 30. do 37. ovog zakona, za svako vodno područje izrađuje se program mjera, uzimajući u obzir rezultate analiza iz člana 29. ovog Zakona.

(2) Program mjera iz stava (1) ovog člana obuhvaća osnovne i prema potrebi dopunske mjere, koje se detaljnije utvrđuju propisom iz člana 25. stav (4) ovog zakona.

(3) Osnovne mjere iz stava (2) ovog člana su:

1. mjere koje se odnose na zaštitu voda:
  - određene ovim zakonom i podzakonskim aktima donesenim na osnovu ovog zakona;
  - određene propisima o zaštiti okoline i zaštiti prirode, a koji se odnose na vodne i od vode zavisne ekosisteme;
  - kojima se osigurava odgovarajući kvalitet vode za snabdijevanje pitkom vodom;
2. mjere koje se odnose na korištenje voda, a koje:
  - se primjenjuju u postupcima izdavanja dozvola za korištenje voda;
  - se odnose na povrat troškova za korištenje i zaštitu voda;
  - potiču održivo korištenje voda.
3. mjere kojima se poboljšavaju hidromorfološki uslovi vodnih tijela.“

#### **Član 10.**

U članu 27. u stavu (1) riječi: „do 2012. godine“ zamjenjuju se riječima: „do kraja 2017. godine.“

#### **Član 11.**

Iza člana 28. dodaju se novi čl. 28a., 28b. i 28c. koji glase:

#### **Član 28a.**

##### **Monitoring stanja površinskih i podzemnih voda i zaštićenih područja**

- (1) Radi dobivanja jasnog i sveobuhvatnog pregleda stanja voda u svakom vodnom području, nadležna agencija za vode uspostavlja program monitoringa stanja voda:
  - a. za površinske vode program obuhvaća:
    - vodostaje i proticaje u mjeri odgovarajućoj za ekološko i hemijsko stanje i ekološki potencijal i
    - ekološko i hemijsko stanje i ekološki potencijal;
  - b. za podzemne vode program obuhvaća monitoring hemijskog i kvantitativnog stanja;
  - c. za zaštićena područja program se nadopunjuje specifičnim podacima utvrđenim zakonom po kojem su pojedina zaštićena područja uspostavljena.
- (2) Monitoring stanja voda provodi se u skladu sa propisom iz člana 43. stav (1) tač 2., 3. i 6. ovog zakona, a za osjetljiva područja i u skladu sa propisom iz člana 76. stav (2) ovog zakona.

#### **Član 28b.**

##### **Naknada troškova za vodne usluge**

- (1) Naknadom troškova za vodne usluge, uključujući troškove zaštite okoliša i troškove resursa, u skladu sa ekonomskom analizom iz člana 29. stav (2) ovog zakona, i posebno u skladu s principom „zagađivač plaća“ i „korisnik plaća“, osigurava se:
  - da politika cijena vode predstavlja odgovarajući poticaj korisnicima da koriste vodu racionalno i da time doprinesu ostvarenju okolišnih ciljeva iz ovog zakona;
  - da odgovarajuće učešće korisnika vode namijenjene za industriju, domaćinstva i poljoprivredu, u naknadi troškova vodnih usluga, uzima u obzir socijalne, okolišne i privredne efekte naknade, kao i geografske i klimatske uslove.

- (2) U planu upravljanja vodama iz člana 25. ovog zakona daje se prikaz planiranih koraka za primjenu odredbi stava (1) ovog člana koji će doprinijeti postizanju okolišnih ciljeva iz ovog zakona, kao i o učešću različitih vidova korištenja vode u naknadi troškova za vodne usluge.
- (3) Odredbe ovog člana nisu smetnja za finansiranje preventivnih ili mjera za oporavak, radi postizanja ciljeva ovog zakona.
- (4) Vlada Federacije na prijedlog federalnog ministra i federalnog ministra nadležnog za okoliš donosi uredbu o metodologiji utvrđivanja najniže osnovne cijene vodnih usluga.
- (5) Na osnovu propisa iz stava (4) ovog člana kantonalni ministri nadležni za komunalne djelatnosti donose propise kojim će se odrediti najniža osnovna cijena vodnih usluga i vrste troškova koje ta cijena pokriva na području kantona, a konačnu cijenu će utvrđivati jedinice lokalne samouprave.

### **Član 28c.**

#### **Kombinovani pristup za tačkaste i rasute izvore**

Za svako ispuštanje otpadnih voda u površinske vode primjenjuje se kombinovani pristup koji obuhvaća:

- (a) kontrolu emisija utemeljenih na najboljoj postojećoj tehnologiji; ili
- (b) kontrolu odgovarajućih graničnih vrijednosti emisija; ili
- (c) kod raspršenih izvora, kontrole koje uključuju, u dotičnom slučaju, najbolju ekološku praksu,

shodno ovom Zakonu i propisima donesenim na osnovu ovog Zakona, uključujući primjenu dobre ekološke prakse shodno propisima o okolišu, te primjenu dobre poljoprivredne prakse shodno propisima o poljoprivredi."

### **Član 12.**

U članu 29. riječi: „Nadležna agencija za vode iz člana 152. ovog zakona“ zamjenjuju se riječima:

„(1) Agencija za vode iz člana 152. ovog zakona na pripadajućem vodnom području.“

Iza stava (1) dodaje se novi stav (2) koji glasi:

„(2) Ekonomska analiza iz stava (1) tačka 3. ovog člana sadrži dovoljno informacija odgovarajućeg stepena detaljnosti, uzimajući u obzir i troškove prikupljanja relevantnih podataka, u cilju:

- a) izrade proračuna neophodnih za primjenu načela naknade troškova za vodne usluge, shodno članu 28b. ovog zakona, uzimajući u obzir dugoročne prognoze o isporuci vode i zahtjevima za vodom u vodnom području i, po potrebi:
  - procjene količine, cijena i troškova u vezi s vodnim uslugama, i
  - procjene odgovarajućih investicija, uključujući i prognoze takvih investicija;
- b) donošenja odluka o ekonomski najprihvatljivijim kombinacijama mjera u vezi sa korištenjem voda, koje se uključuju u programe mjera iz člana 26. ovog zakona, na osnovu procjene potencijalnih troškova tih mjera.“

### **Član 13.**

U članu 31. naslov člana: „Određivanje karakteristika tipova vodnih tijela“ zamjenjuje se riječima: „Razvrstavanje vodnih tijela“.

U članu 31. stav (1) briše se.

Dosadašnji st. (2), (3), (4) i (5) postaju st. (1), (2), (3) i (4).

U članu 31. u stavu (4) iza riječi: „grupisati“, tačka se zamjenjuje interpunkcijskim znakom zarezom i dodaju se riječi: „shodno odredbama podzakonskog propisa iz člana 43. stav (1) tač. 1., 2. i 3. ovog zakona.“

#### **Član 14.**

Dodaje se novi član 35a. koji glasi:

#### **Član 35a.**

##### **Privremeno pogoršanje stanja voda**

- (1) Privremeno pogoršanje stanja vodnih tijela se dozvoljava ukoliko nastupi kao posljedica prirodnih događaja (prirodnih pojava) ili više sile koja je izuzetna i opravdano se nije mogla predvidjeti, naročito pojave kao što su ekstremne poplave i dugotrajne suše, ili ako nastaje kao rezultat akcidentnih okolnosti koje se nisu mogle predvidjeti, ako su kumulativno ispunjeni sljedeći uslovi:
  - a) da su poduzete sve moguće mjere kako bi spriječio daljnje pogoršanje stanja uz obavezu za ispunjenje okolišnih ciljeva na drugim vodnim tijelima koje nisu pogođene ovim okolnostima,
  - b) da su navedeni uslovi pod kojima će nastupiti ekstremne okolnosti ili pojave koje se opravdano nisu mogle predvidjeti, koristeći se i odgovarajućim pokazateljima. Sve se ovo daje u planu upravljanja riječnim slivovima,
  - c) da su mjere koje treba poduzeti u takvim izuzetnim okolnostima uključene u program sanacije i ne isključuju mogućnost oporavka vodnog tijela i kvaliteta vode kada okolnosti više ne postoje,
  - d) da se efekti ekstremnih okolnosti koje se nisu mogle razumno predvidjeti, ocjenjuju jednom godišnje uz obavezu sprovođenja svih mjera usmjerenih na najranije moguće izvodljivo vraćanje statusa vodnih tijela koja su imali prije nastupanja ekstremnih okolnosti,
  - e) da sažetak efekata ekstremnih okolnosti i poduzetih mjera koje su provedene ili će biti implementirane prema tač. a) i b), budu uključeni u naredne revizije plana upravljanja.
- (2) Privremeno pogoršanje stanja vodnih tijela iz stava 1. ovog člana ne predstavlja kršenje odredbi ovog zakona."

#### **Član 15.**

U članu 42. stav (4) briše se.

Sadašnji stav (5) mijenja se i glasi:

„(5) Federalni ministar daje mišljenje na nacrt prostornog plana, ili drugih planova (energetika, saobraćaj, poljoprivreda, industrija, šume, ribarstvo i sl.) o usklađenosti sa planom upravljanja vodama vodnog područja i odredbama ovog zakona, uz prethodno stručno mišljenje nadležne agencije za vode.“

Dosadašnji st. (5), (6) i (7) postaju st. (4), (5) i (6).

#### **Član 16.**

Član 54. mijenja se i glasi:

#### **Član 54.**

##### **Opća obaveza odvodnje i tretmana otpadnih voda**

- (1) Pravna i fizička lica dužna su otpadne vode ispuštati u javne ili individualne sisteme odvodnje otpadnih voda, odnosno na drugi način u skladu sa odlukom o odvodnji otpadnih voda.
- (2) Odluka iz stava (1) ovog člana sadrži naročito: odredbe o načinu odvodnje otpadnih voda naselja na području općine ili grada, obavezu priključenja na javni kanalizacioni sistem, način i stepen tretmana otpadnih voda, uslove i način ispuštanja otpadnih voda



putem sistema individualne odvodnje naselja na području općine ili grada na kojima nije izgrađen takav sistem, obavezu posebnog odlaganja i odstranjivanja opasnih i drugih materija, uključujući i mulj sa postrojenja za prečišćavanje otpadnih voda, te obavezu održavanja javnih kanalizacionih sistema i sistema individualne odvodnje otpadnih voda.

- (3) Odluku iz stava 1. ovog člana na području grada, odnosno općine donosi gradsko, odnosno općinsko vijeće, nakon sprovedene javne rasprave. U slučaju da se istim sistemom javne odvodnje otpadnih voda odvodi voda sa područja više općina odluku donosi organ određen propisom kantona.
- (4) Nadležni organ iz stava (3) ovog člana dužan je na nacrt odluke pribaviti prethodno mišljenje mjesno nadležne agencije za vode.
- (5) Nadležni organ iz stava (3) ovog člana jedan primjerak odluke dostavlja mjesno nadležnoj agenciji i mjesno nadležnom kantonalnom ministarstvu, u roku od 60 dana od dana donošenja odluke.
- (6) Izmjena odluke iz stava (1) ovog člana se vrši po istoj proceduri kao i njeno donošenje.
- (7) Sadržaj odluke iz stava 2. ovog člana i druga pitanja bitna za ovu odluku, uključujući i uslove ispuštanja otpadnih voda na područjima gdje nije izgrađen javni kanalizacioni sistem, detaljnije će se regulisati podzakonskim propisom koji donosi Vlada Federacije na prijedlog federalnog ministra."

#### **Član 17.**

U članu 62. u stavu (1) riječi: „koji osigurava očuvanje prirodne ravnoteže i ekosistema vezanih za vodu“ zamjenjuju se riječima: „kojim se osigurava dostizanje ciljeva zaštite okoliša iz čl. 30. do 37. ovog zakona kroz održivo korištenje vode.“

U stavu (4) istog člana riječi: „i potrebna istraživanja, uzimajući u obzir specifičnosti lokalnog ekosistema i sezonske varijacije protoka i procedure određivanja ovog protoka“ zamjenjuju se riječima: „određivanja ekološki prihvatljivog protoka za nove i postojeće korisnike voda, uzimajući u obzir ciljeve zaštite okoliša iz čl. od 30. do 37. ovog zakona, prateće mjere kojima se može postići dostizanje ciljeva zaštite okoliša, vrstu korištenja voda, mogući prevladajući javni interes i socio-ekonomske uticaje, specifičnosti lokalnoga ekosistema, odstupanja koja se mogu dopustiti u jako izmijenjenim vodnim tijelima, raspoloživost podataka i potrebu za novim istraživanjima, kao i postepene primjene odredbi pravilnika.“

#### **Član 18.**

U članu 63. riječi: "ne remeti prirodnu ravnotežu ekosistema" brišu se.

#### **Član 19.**

Član 64. mijenja se i glasi:

#### **Član 64.**

##### **Laboratorije za vode**

- (1) Provođenje analiza bioloških, fizičko-hemijskih i hemijskih parametara za potrebu provođenja programa monitoringa stanja voda za vodno područje rijeke Save i vodno područje Jadranskog mora, kontrolu rezultata ovlaštene laboratorije iz stava (3) ovog člana, izvršavanje zadataka utvrđivanja stanja voda u pojedinačnim slučajevima iz nadležnosti ili po nalogu agencija za vodno područje ili po zahtjevu Federalnog ministarstva, federalnog ministarstva nadležnog za okoliš, kantonalnih ministarstava nadležnih za vode i okoliš i vodne inspekcije, vrši Laboratorija za vode Agencije za vodno područje rijeke Save Sarajevo (u daljem tekstu: Laboratorija).

- (2) Poslovi Laboratorije iz stava (1) ovog člana finansiraju se iz sredstava koji su prihod agencija za vode tako da AVP Sava snosi troškove za vodno područje rijeke Save, a AVP Jadransko more snosi troškove za vodno područje Jadranskog mora, na način da AVP Jadransko more vrši prenos sredstava AVP Sava u vrijednosti stvarnih godišnjih troškova izvršenih poslova na vodnom području Jadranskog mora na osnovu sporazuma između agencija za vode i godišnjeg programa monitoringa koji je sastavni dio Plana i finansijskog plana AVP Jadransko more.
- (3) Monitoring kvaliteta otpadne vode, efluenta sa postrojenja za prečišćavanje otpadne vode i utvrđivanje količine zagađenja izražene preko ES-a vrši ovlaštena laboratorija.
- (4) Uslove koje mora ispunjavati Laboratorija iz stava (1) ovog člana i uslove i način davanja ovlaštenja laboratorijima iz stava (3) ovog člana, utvrđuje federalni ministar posebnim propisom.
- (5) Ovlaštenje za rad laboratorija iz stava 3. ovog člana daje Federalno ministarstvo na period od četiri godine.
- (6) Ako se prilikom kontrole rezultata ovlaštene laboratorije, vrijednosti ukupnog tereta zagađenja razlikuju za više od 20% od onih koje je utvrdila laboratorija iz stava (1) ovog člana nakon dva kontrolna mjerenja, laboratorija iz stava (1) ovog člana izvještaj o rezultatima kontrole dostavlja Federalnom ministarstvu koje će na osnovu istih ukinuti ovlaštenje iz stava (5) ovog člana izdato kontrolisanoj ovlaštenoj laboratoriji.
- (7) Pravno lice kome je ovlaštenje ukinuto ne može podnijeti zahtjev za ponovno izdavanje ovlaštenja u roku od dvije godine od dana donošenja rješenja o oduzimanju ovlaštenja.
- (8) Izricanje kazni pravnim i fizičkim licima zbog čijeg je djelovanja ili propuštanja nastupilo zagađenje voda može se vršiti samo na osnovu rezultata analize Laboratorije iz stava (1) ovog člana."

#### **Član 20.**

U članu 66. iza stava (4) dodaje se novi stav (5) koji glasi:

„(5) Mjere zaštite izvorišta unutar odlukom utvrđenih zona sanitarne zaštite iz stava (4) ovog člana imaju prioritet u odnosu na sve druge mjere zaštite u istom području.“

#### **Član 21.**

U članu 68. stav (5)) mijenja se i glasi:

„(5) U slučajevima donošenja Odluke o zaštiti izvorišta čije se zone sanitarne zaštite pored područja Federacije BiH pružaju i na području Republike Srpske, odnosno Distrikta Brčko, organi iz st. (2), (3) i (4) donose odluke za područje u Federaciji BiH za koje su nadležni, a putem Federalnog ministarstva podnose zahtjev nadležnom organu za vode za donošenje odluke na području Republike Srpske odnosno Distrikta Brčko.

Iza stava (5) dodaje se novi stav (6) koji glasi:

(6) Nadležni organ iz stava (1) ovog člana u saradnji sa nadležnim organima iz st. (2), (3), (4) i (5) ovog člana provodi javnu raspravu o nacrtu odluke, pribavlja mišljenje općina na čijem području se protežu zaštitne zone i mišljenja nadležnih agencija za vode sa područja obuhvata zaštitnih zona, kojoj jedan primjerak odluke dostavlja u roku od 60 dana od njenog donošenja.“

Dosadašnji stav (6) postaje stav (7).

#### **Član 22.**

Član 79. briše se.

#### **Član 23.**

Član 80. mijenja se i glasi:

## **'Član 80.**

### **Uređenje vodotoka**

Uređenje vodotoka prema ovom Zakonu obuhvaća izgradnju zaštitnih vodnih objekata iz člana 14. stav 1. tačka 1. ovog Zakona i objekata za plovidbu iz člana 14. stav 1. tačka 3. alineja 5. ovog zakona."

## **Član 24.**

Član 81. mijenja se i glasi:

## **'Član 81.**

### **Održavanje vodotoka i vodnih objekata**

(1) Održavanje vodotoka i vodnih objekata obuhvaća naročito:

1. rad na održavanju prirodnih i vještačkih vodotoka kao što je čišćenje vodotoka od otpada antropogenog porijekla, uklanjanje prepreka, djelimično oblaganje dna korita i obala i vađenje materijala iz vodotoka radi uklanjanja sprudova odnosno obezbjeđenja kapaciteta proticajnog profila korita, produbljivanja dna, ublažavanja zavoja bez značajnije promjene trase korita i sl.;
2. izvođenje zemljanih i sličnih radova na održavanju obala, zemljani radovi u inundacijskom pojasu, krčenje rastinja i sl.;
3. održavanje regulacijskih i zaštitnih vodnih objekata kao što je popravak, pojačanje i obnavljanje nasipa, krčenje, košenje i rad na vegetativnoj zaštiti objekta, zamjena oštećenih dijelova građevine i sl.;
4. održavanje vodnih objekata za melioracijsku odvodnju kao što je čišćenje, tehničko i vegetativno održavanje objekata i pojasa uz objekte, zemljani radovi na manjim dopunama kanalske mreže, ublažavanje zavoja i nagiba, drenažni radovi, izrada tipskih propusta i sličnih objekata koji su sastavni dio kanalske mreže, njihovo obnavljanje, zamjena i sl.

(2) Izvođač radova za aktivnosti iz stava (1) tač. 1. i 2. ovog člana na mjestu izvođenja radova obavezan je posjedovati prethodnu vodnu saglasnost nadležnog organa za upravljanje vodama, a kada vrši radove održavanja objekta iz stava (1) tač. 3. i 4. ovog člana pisano odobrenje korisnika ili operatera objekta, dok izvođenje aktivnosti vađenja materijala iz vodotoka podliježe pribavljanju vodne saglasnosti iz odredbe člana 109. stav (2) tačka f) ovog zakona i njeno posjedovanje na mjestu izvođenja radova.

(3) U periodu trajanja proglašene prirodne nepogode i druge nesreće po važećim propisima o zaštiti i spašavanju, izvođač radova iz stava (1) ovog člana dužan je posjedovati samo pisanu saglasnost organa nadležnog za upravljanje vodama, izdatu po zahtjevu gradskog, odnosno općinskog štaba civilne zaštite, što u navedenom periodu uključuje i vađenje materijala iz vodotoka.

(4) Pisana saglasnost iz stava (3) ovog člana sadrži: vrstu radova održavanja, vrijeme izvođenja radova, precizan lokalitet i dionicu vodotoka, orijentacionu količinu materijala i lokaciju deponije."

## **Član 25.**

Član 82. mijenja se i glasi:

## **'Član 82.**

### **Vađenje materijala iz vodotoka**

- (1) Vađenje i uklanjanje materijala iz vodotoka u svrhu održavanja vodotoka i vodnih objekata izvodi se na osnovu utvrđenih potreba za njihovim održavanjem.

- (2) Potrebu za vađenjem materijala iz stava (1) ovog člana samostalno ili po inicijativi općine ili operatera objekta, za vodotoke I. kategorije utvrđuje nadležna agencija, a za vodotoke II. kategorije nadležni kantonalni organ.
- (3) Na temelju utvrđene potrebe i odgovarajuće dokumentacije, nadležni organ iz stava (2) ovog člana sprovodi postupak dodjele ugovora na temelju javnog poziva.
- (4) U postupku dodjele ugovora propisana posebna vodna naknada iz člana 170. stav (1) tačka 4. ovog zakona smatra se najmanjim početnim iznosom, a ugovor se sklapa s ponuđačem koji ponudi najviši iznos ove naknade.
- (5) Materijal iz vodotoka iz stava (1) ovog člana, nakon vađenja i plaćanja ugovorene naknade iz stava (4) ovog člana od strane ponuđača sa kojim je sklopljen ugovor, postaje vlasništvo ponuđača.
- (6) Detaljnije odredbe o sadržaju dokumentacije i postupku sprovođenja dodjele ugovora po javnom pozivu za dodjelu ugovora za vađenje materijala iz vodotoka će se urediti podzakonskim propisom kojeg donosi Vlada Federacije, na prijedlog Federalnog ministarstva."

#### **Član 26.**

Iza člana 82. dodaju se novi čl. 82a. i 82b koji glase:

#### **Član 82a.**

##### **Višak materijala iz vodotoka kod radova uređenja i održavanja vodotoka**

- (1) Za radove uređenja vodotoka iz člana 80. ovog zakona i održavanja vodotoka i vodnih objekata iz člana 81. stav (1) ovog zakona a koji obuhvaćaju i radove vađenja i uklanjanja materijala, nadležni organ provodi postupak javne nabavke radova (uređenja ili održavanja vodotoka) u skladu sa odredbama zakona o javnim nabavkama.
- (2) Ako izvađeni materijal nije potrebno u cijelosti iskoristiti za radove iz stava (1) ovog člana, višak uklonjenog materijala, ako je to predviđeno tehničkom dokumentacijom i ugovorom, nakon plaćanja posebne vodne naknade postaje vlasništvo izvođača radova.
- (3) Za višak izvađenog materijala iz stava (2) ovog člana izvođač radova je obavezan uplatiti posebnu vodnu naknadu iz člana 170. stav (1) tačka 4. zakona u iznosu utvrđenom odlukom Vlade Federacije iz člana 171. ovog zakona.
- (4) Ako ugovorom iz stava (1) ovog člana nije obuhvaćeno pitanje viška materijala to pitanje se rješava primjenom odredbi člana 82. st. (3) i (4) ovog zakona.

#### **Član 82b.**

##### **Naknada štete za materijal izvađen suprotno odredbama ovog zakona**

- (1) Pravno ili fizičko lice koje suprotno odredbama ovog zakona vadi materijal iz vodotoka, ili vrši druge radove u vodotoku, dužno je nadoknaditi nastalu štetu i sanirati devastirano riječno korito.
- (2) Vlada Federacije na prijedlog Federalnog ministarstva odlukom propisuje visinu naknade štete u vidu uvećane tržišne vrijednosti za nezakonito izvađeni materijal iz stava(1) ovog člana.
- (3) Rješenje o naknadi štete iz stava (1) ovog člana donosi nadležna vodna inspekcija u skladu sa odlukom iz stava (2) ovog člana.
- (4) Protiv rješenja iz stava (3) ovog člana može se izjaviti žalba nadležnom organu prema odredbama ovog zakona. Žalba ne odlaže izvršenje rješenja."

#### **Član 27.**

U članu 85. stav (3) briše se.

#### **Član 28.**

Član 86. mijenja se i glasi:

#### **'Član 86.**

##### **Plan upravljanja poplavnim rizikom**

- (1) Radi sagledavanja svih aspekata upravljanja poplavnim rizikom na ugroženim područjima, smanjenja stepena ugroženosti od poplava ljudi i materijalnih dobara i radi utvrđivanja ciljeva, potrebnih mjera i aktivnosti zaštite od štetnog djelovanja voda na tim područjima, donose se planovi upravljanja poplavnim rizikom za svako poplavno područje utvrđeno kroz prethodnu izradu preliminarne procjene poplavnog rizika, karata opasnosti i karata poplavnog rizika.
- (2) Planovi iz stava (1) ovog člana izrađuju se u skladu sa odredbama propisa iz člana 90. stav (3) ovog zakona, a donosi ih Vlada Federacije."

#### **Član 29.**

Član 89. mijenja se i glasi:

#### **'Član 89.**

##### **Mjere zaštite**

U cilju zaštite od štetnog djelovanja voda, Federacija, kantoni, gradovi i općine na ugroženom području iz čl. 87. i 88. ovog zakona, koordinirano planiraju i provode mjere zaštite, gradnju i upravljanje zaštitnim vodnim objektima iz člana 14. stav (1) tač. 1. i 2. ovog zakona."

#### **Član 30.**

U članu 90. st. (1) i (2) mijenjaju se i glase:

„(1) Obim zaštite od štetnog djelovanja voda i potrebne mjere određuju se planovima iz člana 86. stav (1) ovog zakona i operativnim planovima aktivne odbrane od poplava i leda.

(2) Kod određivanja obima zaštite iz stava (1) ovog člana sagledavaju se svi aspekti smanjenja poplavnog rizika, a naročito:

1. sprječavanje i zaštita od plavljenja ugroženog područja;
2. pripremu, uključujući prognozu i sistem ranog upozoravanja;
3. specifične karakteristike ugroženog područja u okviru riječnog sliva ili dijela riječnog sliva;
4. poduzimanje mjera podrške praksama održivog korištenja zemljišta, povećanja mogućnosti zadržavanja vode i kontroliranog plavljenja određenih područja u slučaju poplava.“

#### **Član 31.**

Član 91. mijenja se i glasi:

#### **'Član 91.**

##### **Osmatranje, prognoza i rano upozorenje**

- (1) Federacija osigurava praćenje i prognozu vanrednih meteoroloških i hidroloških stanja u cilju zaštite od štetnog djelovanja voda, a naročito praćenje i prognozu vanrednih hidroloških stanja, meteoroloških i drugih prirodnih pojava kao što su poplave, pojava bujica, erozije i leda na vodotocima.
- (2) Nadležne agencije za vodno područje u suradnji sa Federalnim hidrometeorološkim zavodom uspostavljaju sistem za praćenje i prognozu vanrednih hidroloških stanja na pripadajućem vodnom području radi pravovremenog obavještavanja stanovništva na ugroženim područjima putem Federalne uprave civilne zaštite i sredstava informisanja.
- (3) Federalni hidrometeorološki zavod uspostavlja sistem za praćenje i prognozu vanrednih meteoroloških stanja i prognozu takvih stanja radi pravovremenog obavještavanja nadležnih agencija za vodno područje i stanovništva putem civilne zaštite i sredstava informisanja.
- (4) Vlasnik, odnosno operator objekta od značaja za zaštitu od štetnog djelovanja voda dužan je vršiti monitoring i praćenje stanja stabilnosti nasipa, brana sa akumulacijama i drugih pregrada na vodotocima, te o tome podatke dostavljati u informacioni sistem voda iz člana 98. ovog zakona, na način propisan vodnim aktom.
- (5) Podaci monitoringa iz st. (2), (3) i (4) ovog člana dio su sistema praćenja, obavještavanja i uzbunjivanja, u skladu sa propisima o zaštiti od prirodnih i drugih nesreća."

#### **Član 32.**

U članu 92. st. (4) i (5) mijenjaju se i glase:

„(4) Federalni ministar, na osnovu propisa iz člana 90. stav (3) ovog zakona, donosi operativni plan odbrane od poplava i leda za područja uz površinske vode I. kategorije.

(5) Kantonalni ministar nadležan za vode, na osnovu propisa iz člana 90. stav (3) ovog zakona, donosi operativni plan odbrane od poplava i leda za područja uz površinske vode II. kategorije na teritoriji kantona.“

#### **Član 33.**

Član 94. mijenja se i glasi:

#### **Član 94.**

##### **Sanacije posljedica štetnog djelovanja voda**

- (1) Ako su posljedice štetnog djelovanja voda nastale na javnom vodnom dobru ili zaštitnom vodnom objektu koji su u vlasništvu Federacije, sredstva za njihovu sanaciju osiguravaju Vlada Federacije i nadležna agencija za vode iz člana 152. ovog Zakona.
- (2) Ako su posljedice štetnog djelovanja voda nastale na javnom vodnom dobru ili vodnom objektu koji je u vlasništvu kantona, grada ili općine, sredstva za njihovu sanaciju osigurava kanton, grad ili općina, odnosno pravno lice kome je povjereno upravljanje i korištenje vodnog objekta.
- (3) Ako su posljedice štetnog djelovanja voda nastale na vodnom dobru ili na vodnom objektu koje je u vlasništvu pravnog ili fizičkog lica, sredstva za njihovu sanaciju osigurava vlasnik odnosno operater.
- (4) Ukoliko su prilikom poplava nastala oštećenja na zaštitnim vodnim objektima, javnom vodnom dobru i/ili koritima vodotoka koje nije moguće sanirati kroz tekuće godišnje planove nadležne agencije za vode i kantona, nadležna agencija za vodno područje i nadležna kantonalna ministarstva za vode na poplavljenim područjima će pripremiti prijedlog Programa sanacije posljedica poplava na površinskim vodama I. kategorije,

javnom vodnom dobru i zaštitnim vodnim objektima u vlasništvu Federacije i površinskim vodama II. kategorije, javnom vodnom dobru i zaštitnim vodnim objektima u vlasništvu kantona, grada ili općine na vodnom području, sa procjenom potrebnih sredstava za sanaciju i izvorima finansiranja, koji se putem Federalnog ministarstva dostavlja Vladi Federacije na donošenje.

- (5) U slučaju nastanka štetnih posljedica poplava samo na vodama i objektima iz stava (2) ovog člana, pogođeni kanton, grad ili općina donose program sanacije posljedica štetnog djelovanja voda, sa procjenom potrebnih sredstava za sanaciju i izvorima finansiranja, u skladu sa propisom kantona.
- (6) Programe sanacije iz st. (4) i (5), nadležni organi su dužni izraditi i uputiti na donošenje najkasnije u roku od 6 mjeseci od dana pojave poplave i nastanka štetnih posljedica."

#### **Član 34.**

U članu 96. u stavu (1) tačka 10. mijenja se i glasi:

"10. u inundacionom području istovarati ili deponovati bilo kakav materijal, osim materijala namijenjenog mjerama zaštite od poplava odnosno privremenog odlaganja materijala u skladu sa izdatim vodnim aktom."

U tački 14. istog stava riječi: „i druge krute i tečne materije i materijale“ zamjenjuju se riječima: „komunalni otpad i druge krute i tečne materije.“

U tački 15. istog stava riječi: „izuzev zaštitnih šuma“ brišu se.

U stavu (2) tačka 1. istog člana mijenja se i glasi:

„1. u inundacionom području sjeći drveće i krčiti rastinje;“

U istom stavu tačka 2. briše se.

Dosadašnje tač. 3. i 4. postaju tač. 2. i 3..

#### **Član 35.**

U članu 97. stav (2) briše se.

#### **Član 36.**

U članu 99. stav (2) tačka 4 se briše.

#### **Član 37.**

Član 103. se briše.

#### **Član 38.**

U članu 107. stav (1) mijenja se i glasi:

„(1) Radi postizanja ciljeva upravljanja vodama propisanih odredbama ovog zakona izdaju se vodni akti: prethodna vodna saglasnost, vodna saglasnost i vodna dozvola.“

#### **Član 39.**

Član 109. mijenja se i glasi:

#### **Član 109.**

##### **Aktivnosti za koje su uvijek potrebni vodni akti**

Aktivnosti za koje su uvijek potrebni vodni akti:

- (1) Prethodna vodna saglasnost, vodna saglasnost i vodna dozvola moraju se pribaviti za sljedeće aktivnosti i to:
- a) zahvatanje vode za:

- industriju i energetiku;
  - poljoprivredu;
  - vodoopskrbu;
  - uslužne djelatnosti koje u tehnološkom postupku koriste vodu;
  - turističke djelatnosti;
  - uzgoj ribe;
- b) ispuštanje otpadnih voda u površinske vode;
- c) ispuštanje tehnoloških otpadnih voda u javni kanalizacijski sistem ili sabirnu jamu,
- d) iskorištavanje hidroenergije;
- e) formiranje akumulacija, uključujući i zahvatanje vode iz akumulacije za različite namjene, bez obzira na količinu zahvatanja;
- f) umjetno prihranjivanje podzemnih voda;
- g) deponovanje otpada;
- h) kavezni uzgoj ribe na vještačkim jezerima i moru.
- (2) Prethodna vodna saglasnost i vodna saglasnost se moraju pribaviti za sljedeće aktivnosti:
- a) izgradnju vodnih objekata iz člana 14. stav (1) tač. 1., 2. i alineja 5. tačke 3. ovog zakona;
- b) izgradnju saobraćajnica (putnih i željezničkih);
- c) izgradnju mostova ili drugih objekata iznad ili u vodotoku;
- d) uređenje kupališta na vodama iz člana 72. ovog zakona;
- e) rudarske i eksploatacijske radove;
- f) vađenje materijala iz vodotoka;
- g) postavljanje ili gradnja na vodnom dobru privremenih objekata iz člana 12. stav 1. tačka 8. ovog zakona.

Za aktivnosti iz stava (2) ovog člana nije potrebno pribavljanje vodne dozvole.

- (3) Pored aktivnosti iz st. (1) i (2) ovog člana, prethodna vodna saglasnost izdaje se za:
- a) istražne i druge slične radove koji mogu imati specifične utjecaje na vode, što se cijeni u svakom konkretnom slučaju od strane organa nadležnog za izdavanje vodnog akta;
- b) promet opasnih materija i druge aktivnosti koje mogu imati specifične utjecaje na vode i kojima se može privremeno ili trajno degradirati kvalitet voda, ili ometati poboljšanje njihovog postojećeg kvaliteta, povećati rizik od poplave i erozije, značajno smanjiti kvantitet voda, promijeniti morfologija vodotoka, ometati korištenje površinskih voda za rekreaciju i dr.
- c) aktivnosti održavanja vodotoka iz člana 81. stav (1) tač. 1. i 2. ovog zakona ukoliko ti radovi ne obuhvaćaju vađenje materijala iz vodotoka.
- (4) Aktivnosti iz stava (3) ovog člana i uslovi za njihovo obavljanje, uključujući i rokove važenja izdate prethodne vodne saglasnosti obzirom da za iste nije potrebno pribavljanje vodne saglasnosti i vodne dozvole, se detaljnije propisuju pravilnikom iz člana 107. stav (4) ovog zakona.
- (5) Aktivnosti iz st. (1), (2) i (3) ovog člana i pripadajući vodni objekti podliježu uslovima propisanim ovim zakonom i propisima o građenju."

#### **Član 40.**

Član 110. mijenja se i glasi:

#### **Član 110.**

- (1) Vodni akti nisu potrebni:
- a) za korištenje vode koja ne prelazi obim opće upotrebe vode iz člana 46. ovog zakona;



- b) za gašenje požara i preduzimanje hitnih sanitarnih i drugih mjera u slučaju opće opasnosti;
  - c) za ispuštanje oborinskih voda, osim oborinskih onečišćenih;
  - d) za građenje novih i rekonstrukciju postojećih objekata u kojima se voda koristi isključivo za piće i sanitarne potrebe, bez obzira na način snabdjevanja vodom, a iz kojih se ispuštanje sanitarnih otpadnih voda vrši u javni kanalizacioni sistem ili septičku jamu ili sabirnu jamu;
  - e) za ispuštanje sanitarnih otpadnih voda u javni kanalizacioni sistem koji se vrši u skladu sa odobrenjem operatera kanalizacionog sistema, ili u sabirnu jamu u skladu sa odlukom o odvodnji, čije pražnjenje vrši operater javnog kanalizacionog sistema na pripadajućem području;
  - f) za snabdijevanje vodom putem priključka na javni vodovodni sistem koje se vrši u skladu sa odobrenjem operatera vodovodnog sistema;
  - g) za rafting i splavarenje;
  - h) za radove rekonstrukcije, sanacije, održavanja, zamjene dijelova opreme i drugih aktivnosti na postojećim objektima za koje su izdani odgovarajući vodni akti, a kojim radovima se ne utiče na postojeći režim površinskih i podzemnih voda.
- (2) Dodatne aktivnosti za koje nisu potrebni vodni akti mogu se dopuniti propisom iz člana 107. stav (4) ovog zakona."

#### **Član 41.**

U članu 111. st. (1) i (2) mijenjaju se i glase:

„(1) Prethodnom vodnom saglasnošću odlučuje se o postojanju uslova na konkretnoj lokaciji za vršenje aktivnosti za koju se traži izdavanje prethodne vodne saglasnosti i utvrđuju uslovi kojima treba udovoljiti dokumentacija za izvođenje planirane aktivnosti koja se podnosi uz zahtjev za izdavanje vodne saglasnosti, izuzev za aktivnosti iz člana 109. stav (3) ovog zakona gdje se prethodnom vodnom saglasnošću odlučuje o postojanju uslova, utvrđuje način izvođenja aktivnosti i ograničenja za njeno vršenje, kao i naknada štete ukoliko ista nastane vršenjem predmetne aktivnosti.

(2) Prethodna vodna saglasnost iz stava (1) ovog člana pribavlja se:

- u postupku izdavanja urbanističke saglasnosti
- u postupku izdavanja lokacijske informacije;
- u postupku izdavanja koncesije na vodama i vodnom dobru;
- za aktivnosti za koje je ovim zakonom propisano pribavljanje vodnog akta, koje ne podliježu obavezi pribavljanja urbanističke saglasnosti/lokacijske informacije.”

U stavu (3) istog člana riječi: „objekte ili radove” zamjenjuju se riječima: „aktivnosti iz člana 109. st. (1) i (2) ovog zakona“.

Iza stava (3) dodaju se novi st.(4) i (5) koji glase:

„(4) Prethodna vodna saglasnost se izdaje uz prethodno pribavljeni izvod iz prostorno-planskih dokumenata sa stručnim mišljenjem organa nadležnog za prostorno planiranje kojim se potvrđuje da je aktivnost iz zahtijeva usklađena sa prostorno planskim dokumentima.

(5) Izvod iz prostorno-planskih dokumenata sa stručnim mišljenjem organa nadležnog za prostorno planiranje iz stava (4) ovog člana pribavlja organ nadležan za izdavanje prethodne vodne saglasnosti.“

#### **Član 42.**

Član 112. briše se.

#### **Član 43.**

U članu 114. stav (5) mijenja se i glasi:

„(5) Vodna saglasnost za vađenje materijala iz vodotoka uključuje i uslove za uređenje lokaliteta i predmetne dionice vodotoka, a ista prestaje da važi istekom roka od jedne godine od dana njenog izdavanja.“

#### **Član 44.**

Član 115. mijenja se i glasi:

#### **Član 115.**

##### **Vodna dozvola**

Vodnom dozvolom utvrđuje se da su ispunjeni uslovi određeni vodnom saglasnošću i da je uz zahtjev za izdavanje vodne dozvole priložen opći akt iz člana 20. stav (6) ovog zakona, koji se donosi prije izdavanja vodne dozvole."

#### **Član 45.**

Član 116. mijenja se i glasi:

#### **Član 116.**

(1) Za pravna i fizička lica koja ne posjeduju vodnu dozvolu, a vrše aktivnosti za koje je obavezno pribavljanje ovog vodnog akta, kod izdavanja vodne dozvole za prelazni period od maksimalno tri godine nadležni organ propisuje uslove koje je podnosilac zahtjeva dužan ispuniti u zadanom roku.

(2) Ako se zbog promjene u tehnologiji ili iz drugih razloga naknadno izmjeni obim i uslovi korištenja vode, odnosno ispuštanje otpadnih voda u površinske vode potrebno je pribaviti novu vodnu dozvolu."

#### **Član 46.**

U članu 117. u stavu (2) umjesto tačke stavlja se zarez i dodaju riječi: „bez saglasnosti organa koji je izdao vodnu dozvolu.“

U članu 117. iza stava (2) dodaje se novi stav (3) koji glasi:

„(3) Saglasnost iz stava (2) ovog člana se izdaje u vidu zaključka koji se donosi po prijedlogu pravnog ili fizičkog lica.

Dosadašnji stav (3) postaje stav (4).

#### **Član 47.**

U članu 118. u stavu (2) iza riječi „stava (1)“ dodaju se riječi „tač. 2. i 3.“

U istom članu iza stava (3) dodaju se novi st. (4) i (5) koji glase:

„(4) Zahtjev za produženje vodne dozvole iz stava (3) ovog člana se podnosi 60 dana prije isteka roka važenja ranije izdane vodne dozvole.

(5) Uslovi utvrđeni ranijom vodnom dozvolom važe do donošenja rješenja po zahtjevu iz stava (4) ovog člana.“

#### **Član 48.**

U članu 120. stav (1) riječi „organa nadležnog za izdavanje okolinske dozvole“ brišu se.

U članu 120. stav (5) mijenja se i glasi:

„(5) Tehničku dokumentaciju koja se podnosi uz zahtjev za izdavanje vodnog akta izrađuje pravno lice koje je registrovano za obavljanje djelatnosti projektovanja, i posjeduje ovlaštenje organa nadležnog za poslove prostornog uređenja.“

#### **Član 49**

U članu 129. stav (2) mijenja se i glasi:

„Nadležni organ iz člana 139. ovog zakona dužan je 6 (šest) mjeseci prije isteka važenja vodne dozvole obavijestiti pravno lice kojem je isti izdat.“

Stav (3) istog člana briše se.

#### **Član 50.**

U članu 130. stav (1) tač. 3. i 4. mijenjaju se i glase:

"3. je nositelj prava iz vodnog akta proveo mjere i aktivnosti koje su utvrđene u vodnom aktu, ovom zakonu ili drugim važećim propisima, zbog kojih je došlo do bitne izmjene uslova koji su navedeni u vodnom aktu,

4. je izmjena potrebna radi stupanja na snagu novih propisa ili izmjene propisa koji su bili na snazi prilikom izdavanja vodnog akta."

#### **Član 51.**

Čl. 135. i 136. se brišu.

#### **Član 52.**

U članu 137. naslov „Trajno oduzimanje“ mijenja se i glasi „Ukidanje vodnog akta“.

U stavu (1) riječi: „oduzima se trajno“ mijenjaju se i glase: „ukida se“.

#### **Član 53.**

U članu 138. u naslovu i st. (1), (2) i (4) riječ „oduzimanje“ mijenja se u riječ „ukidanje“ u odgovarajućim padežima.

U stavu (3) istog člana riječ: „oduzet“ mijenja se u riječ: „ukinut“.

#### **Član 54.**

Član 139. mijenja se i glasi:

#### **Član 139.**

##### **Podjela nadležnosti izdavanja vodnih akata**

(1) Agencija za vodno područje je nadležna za izdavanje vodnih akata za:

1. zahvatanje vode u količini većoj od 10 litara u sekundi.
2. ispuštanje otpadnih voda u površinske vode, i to:
  - urbanih otpadnih voda općinskih i gradskih centara i naselja koja imaju više od 2.000 planiranih ES;
  - ispuštanje tehnoloških otpadnih voda;
3. ispuštanje tehnoloških otpadnih voda u javni kanalizacioni sistem ili sabirnu jamu.
4. za iskorištenje hidroenergije kada je:
  - postrojenje locirano na površinskim vodama I. kategorije,
  - postrojenje locirano na površinskim vodama II. kategorije i snage veće od 5 MW;
5. formiranje akumulacije, uključujući i zahvatanje vode iz akumulacije za različite namjene, bez obzira na količinu zahvatanja, kada je akumulacija:
  - locirana na površinskim vodama I. kategorije,
  - locirana na površinskim vodama II. kategorije, a na području je dva ili više kantona;
6. umjetno prihranjivanje podzemnih voda;
7. deponovanje otpada;
8. kavezni uzgoj ribe na vještačkim jezerima koja pripadaju površinskim vodama I. kategorije i moru;
9. izgradnju vodnih objekata iz člana 14. stav (1) tač. 1. 2. i alineja 5. tačke 3. ovog zakona uz ili na površinskim vodama I. kategorije;
10. izgradnju saobraćajnica (željezničkih pruga, autoputeva i magistralnih puteva);
11. izgradnju mostova ili drugih objekata iznad ili u vodotoku I. kategorije;
12. uređenje kupališta iz člana 72. ovog zakona na vodotocima I. kategorije;
13. rudarske i eksploatacione radove;
14. vađenje materijala iz vodotoka I. kategorije;
15. postavljanje ili gradnja na vodnom dobru privremenih objekata iz člana 12. stav 1. tačka 8. ovog zakona uz vodotoke I kategorije;

16. istražne i druge slične radove koji mogu imati specifične uticaje na vode, što se cijeni u svakom konkretnom slučaju od strane organa nadležnog za izdavanje vodnog akta;
  17. promet opasnih materija i druge aktivnosti koje mogu imati specifične uticaje na vode kojim se može privremeno ili trajno degradirati kvalitet voda, ili ometati poboljšanje njihovog postojećeg kvaliteta, povećati rizik od poplave i erozije, značajno smanjiti kvantitet voda, promijeniti morfologija vodotoka, ometati korištenje površinskih voda za rekreaciju i dr.;
  18. aktivnosti održavanja vodotoka I. kategorije iz člana 81. stav (1) tač. 1. i 2. ovog zakona ukoliko ti radovi ne obuhvaćaju vađenje materijala iz vodotoka.
- (2) Kantonalno ministarstvo nadležno za vode nadležno je za izdavanje vodnih akata za:
1. zahvatanje vode za količinu 10 litara u sekundi i manje;
  2. ispuštanje otpadnih voda u površinske vode, i to:
    - urbanih otpadnih voda naselja koja imaju do 2.000 planiranih ES;
    - ispuštanje sanitarnih otpadnih voda iz pojedinačnih objekata putem sistema individualne odvodnje;
  3. iskorištavanje hidroenergije kao što su mlinovi i sl.;
  4. formiranje akumulacije kada je akumulacija locirana na površinskim vodama II. kategorije i nalazi se na području kantona, uključujući i zahvatanje vode iz akumulacije za različite namjene, bez obzira na količinu zahvatanja;
  5. kavezni uzgoj ribe na vještačkim jezerima koja pripadaju površinskim vodama II. kategorije;
  6. izgradnju vodnih objekata iz člana 14. stav (1) tač.1. i 2. ovog zakona uz ili na površinskim vodama II. kategorije;
  7. izgradnju saobraćajnica (regionalnih i lokalnih);
  8. izgradnju mostova ili drugih objekata iznad ili u površinskim vodama II. kategorije;
  9. uređenje kupališta iz člana 72. ovog zakona na površinskim vodama II kategorije;
  10. vađenje materijala iz površinskih voda II kategorije;
  11. postavljanje ili gradnja na vodnom dobru privremenih objekata iz člana 12. stav 1. tačka 8. ovog zakona uz vodotoke II kategorije;
  12. aktivnosti održavanja vodotoka II kategorije iz člana 81. stav (1) tač. 1. i 2. ovog zakona ukoliko ti radovi ne obuhvataju vađenje materijala iz vodotoka.

(3) Kantonalnim propisom se može utvrditi prijenos dijela kantonalnih nadležnosti za izdavanje vodnih akata na grad ili općinu.

(4) Nadležni organ o podnesenom zahtjevu jednim vodnim aktom odlučuje o svim aktivnostima za koje je ovim zakonom propisana obaveza pribavljanja vodnog akta, a koje se vrše u okviru planiranog zahvata podnosioca zahtjeva.

(5) Ako je u okviru planiranog zahvata podnosioca zahtjeva barem jedna od aktivnosti iz stava (1) ovog člana, vodni akt izdaje nadležna agencija za vodno područje. Ako je u okviru planiranog zahvata podnosioca zahtjeva barem jedna od aktivnosti iz stava (2) ovog člana koja nije prenesena u nadležnost grada ili općine, vodni akt izdaje kantonalno ministarstvo nadležno za vode."

## Član 55.

U članu 153. stav (3) riječ: „neprofitna“ se briše, a iza riječi „pravna lica“ dodaju se riječi „vanbudžetski korisnici“.

## **Član 56.**

U članu 155. u stavu (1) riječi: „st. (1) i (2) tačka 2.“ brišu se.

## **Član 57.**

U članu 156. stav (1) tač. 3., 7. 9. i 10. mijenjaju se i glase:

"3. priprema plan upravljanja vodama, planove upravljanja rizikom od poplava za pripadajuće vodno područje, organizuje izradu tehničke dokumentacije za pojedina pitanja upravljanja vodama, te obavlja i druge poslove koji se odnose na upravljanje vodama, u skladu sa ovim zakonom;"

"7. izdaje vodne akte i za obavljanje ovih poslova ovim zakonom se agenciji za vode povjeravaju javna ovlaštenja;"

"9. sarađuje sa nadležnim institucijama Federacije i kantona na pripadajućem vodnom području, koje su korisnici sredstava po ovom zakonu o vodama u svrhu implementacije strategije upravljanja vodama i planova upravljanja vodama, te daje stručna mišljenja sa stanovišta voda o dokumentima iz nadležnosti drugih federalnih i kantonalnih ministarstava, organa grada ili općine koja zatraže ti organi;"

"10. učestvuje u pripremi i provođenju utvrđene politike za oblast voda i legislative koja se odnosi na vode, vrši identifikaciju i predlaganje izvora finansiranja aktivnosti i projekata u svrhu implementacije strategije upravljanja vodama iz člana 24. stav (7) ovog zakona, te vrši implementaciju projekata iz vlastitih, budžetskih i stranih sredstava."

## **Član 58.**

Član 157. mijenja se i glasi:

### **Član 157.**

#### **Povjeravanje stručno-tehničkih poslova trećim licima**

- (1) Obavljanje stručno-tehničkih poslova iz svoje nadležnosti agencija za vode može po procedurama javnih nabavki ustupiti pravnim licima registrovanim za te poslove.
- (2) Federalni ministar propisuje minimalne uslove i kriterije koje moraju zadovoljiti pravna lica iz stava (1) ovog člana."

## **Član 59.**

U članu 167. iza stava (2) dodaje se novi stav (3) koji glasi:

„(3) Kanton je dužan osigurati pripremu i finansiranje prioritetnih projekata, kroz planove institucija na kantonalnom nivou u saradnji sa općinama na području tog kantona, te podatke o tome dostavljati u Informacioni sistem voda nadležne agencije, u svrhu praćenja implementacije strategije upravljanja vodama i drugih planskih dokumenata u oblasti voda.“

## **Član 60.**

U članu 170. u stavu (1) iza alineje 2. dodaje se nova al. 3. i 4. i glasi:

„-vode za proizvodnju alkoholnih i bezalkoholnih pića,  
- termomineralne vode,“

Dosadašnje al. 3., 4., 5., i 6. postaju al. 4., 5., 6. i 7..

U članu 170. stav (2) mijenja se i glasi:

„(2) Obveznik plaćanja posebnih vodnih naknada iz stava 1. tač. 1, 2. i tačka 3. alineja 2. i 3. i tačka 4. ovoga članka je fizička i pravna osoba koja je dužna pribaviti vodnu dozvolu, odnosno vodnu saglasnost za odgovarajuću aktivnost, u smislu odredbi ovog zakona. Za pravna i fizička lica koja se vodom snabdijevaju iz javnog vodovodnog sistema a otpadne vode ispuštaju u javni kanalizacioni sistem ili putem sistema individualne odvodnje, odnosno u skladu sa odlukom o odvodnji, obveznik plaćanja naknada iz stava (1) tačka 1. i tačka 3. alineja 2. ovog člana je operator javnog vodovodnog sistema.“

## **Član 61.**

Član 173. mijenja se i glasi:

### **Član 173.**

(1) Kontrolu izmirivanja i postupak prinudne naplate obaveza po osnovu opće vodne naknade i posebnih vodnih naknada vrši Porezna uprava Federacije BiH.

(2) Kontrolu obračunavanja i plaćanja posebnih vodnih naknada vrše federalna i kantonalna vodna inspekcija i mjesno nadležna agencija koje su dužne o izvršenoj kontroli sačiniti zapisnik sa nalogom obvezniku za postupanje.

(3) Ukoliko obveznik plaćanja vodnih naknada u ostavljenom roku ne postupi po naloženom u zapisniku, primjerak zapisnika se dostavlja nadležnoj poreskoj upravu na daljnje postupanje u skladu sa propisima iz oblasti poreza."

## **Član 62.**

U članu 178. stav (1) tač. 2. i 3. mijenjaju se i glase:

"2. održavanje zaštitnih vodnih objekata u vlasništvu Federacije i sufinansiranje izgradnje zaštitnih vodnih objekata na površinskim vodama I. kategorije u skladu sa posebnom odlukom Vlade Federacije;

3. sufinansiranje aktivnosti iz programa mjera plana upravljanja vodama vodnog područja i drugih planova i akata iz oblasti voda koje donosi Vlada Federacije."

## **Član 63.**

Čl. 180. i 182. brišu se.

## **Član 64.**

Član 183. mijenja se i glasi:

### **Član 183.**

Inspeksijski nadzor nad provođenjem ovog zakona i propisa donesenih na osnovu ovog zakona koji su ovim zakonom stavljeni u nadležnost Federacije, provodi Federalna uprava za inspeksijske poslove putem federalne vodne inspekcije."

## **Član 65.**

Čl. 184. i 185. brišu se.

## **Član 66.**

U članu 187. u stavu (1) dodaju se nove tač. 7. i 8. koje glase:

"7. zabraniti ili ograničiti obavljanje aktivnosti ako su u suprotnosti sa Odlukom o zaštiti izvorišta iz člana 68. ovog Zakona.

8. zabraniti ili ograničiti ispuštanje otpadnih voda koje je u suprotnosti sa Odlukom o odvodnji iz člana 54. ovog Zakona."

Postojeće tač. 7. i 8. postaju 9. i 10. mijenjaju se i glase:

"9. zabraniti vađenje materijala i druge radove u vodotoku ili na vodnom objektu, ako se isti vrše suprotno odredbama čl. 81, 82. i 82a. ovog zakona;

10. odrediti obavezu naknade štete i obavezu sanacije devastiranog riječnog korita, u skladu sa odredbama čl. 82b. st. (1), (2) i (3) ovog zakona."

Postojeća tačka 9. postaje tačka 11.

## **Član 67.**

U članu 190. u stavu (2) tačka 2. mijenja se i glasi:

"2. podnijeti zahtjev nadležnoj građevinsko-urbanističkoj inspekciji za uklanjanje objekta ili postrojenja za koji nije pribavljen odgovarajući vodni akt."

Iza stava (2) dodaje se stav (3) koji glasi:

„(3) Za nezakonite aktivnosti iz člana 96. stav (1) tačka 14. vodni inspektor je dužan obavjestiti nadležnog općinskog ili kantonalnog komunalnog ili građevinskog inspektora.“  
Dosadašnji stav (3) postaje stav (4).

#### **Član 68.**

Član 203. briše se.

#### **Član 69.**

U članu 204. u stavu (1) u prvom redu broj: "50.000,00" zamjenjuje se brojem: "15.000,00".  
U tački 14. istog stava na kraju teksta iza riječi: „akta;“ dodaju se riječi: „iz člana 109. ovog zakona“.

Iza tačke 16. dodaje se nova tačka 17. koja glasi;

"17. ne postupi po utvrđenim obavezama za plaćanje posebne vodne naknade u skladu sa odredbom člana 173. stav (3) ovog zakona".

U stavu 2. istog člana broj: "5.000,00" zamjenjuje se brojem: "3.000,00".

#### **Član 70.**

U članu 205. u stavu (1) u prvom redu broj: "20.000,00" zamjenjuje se brojem: "6.000,00".

Iza tačke 15. dodaje se nova tačka 16. koja glasi:

"16. ne vrši monitoring otpadnih voda."

U istom članu u stavu (2) broj: "3.000,00" zamjenjuje se brojem: "1.500,00".

#### **Član 71.**

U članu 206. u stavu (1) u prvom redu broj: "100,00" zamjenjuje se brojem: "300,00" i broj "2.000,00" zamjenjuje se brojem "1.500,00".

#### **Član 72.**

Član 214. mijenja se i glasi:

#### **Član 214.**

##### **Ranije izdati vodni akti**

- (1) Vodne dozvole koje su izdate do stupanja na snagu ovog zakona usaglasit će se sa odredbama ovog zakona u roku od tri godine od dana stupanja na snagu ovog zakona.
- (2) Vodne saglasnosti izdate do stupanja na snagu ovog zakona usaglasit će se sa odredbama ovog zakona u roku od dvije godine od dana stupanja na snagu ovog zakona.
- (3) Prethodne vodne saglasnosti koje su izdate do stupanja na snagu ovog zakona usaglasit će se sa odredbama ovog zakona u roku od jedne godine od dana stupanja na snagu ovog zakona.
- (4) Nosioци prava iz vodnog akta dužni su podnijeti zahtjev za usklađivanje vodnog akta sa odredbama ovog zakona u roku od godinu dana.
- (5) U slučaju da zahtjev iz stava (4) ovog člana nije podnesen u roku iz stava (4) ovog člana, vodni akt prestaje važiti.
- (6) Odredbe Iz stava (1) ovog člana ne odnose se na vodne dozvole koje važe tri godine ili manje od dana stupanja na snagu ovog zakona."

#### **Član 73.**

Iza člana 215., dodaje se novi član 215a. koji glasi:

#### **Član 215a.**

##### **Neriješeni zahtjevi za izdavanje vodnih akata**

- (1) Zahtjevi za izdavanje vodnih akata koji su podneseni nadležnom organu do dana stupanja na snagu ovog zakona rješavat će se u skladu sa odredbama ovog zakona.
- (2) Postupci po žalbama koji nisu riješeni do dana stupanja na snagu ovog zakona rješavat će se u skladu sa odredbama ovog zakona."

#### **Član 74.**

Član 219. stav (1) mijenja se i glasi:

„(1) Propise iz člana 25. stav (4), člana 57. stav (1), člana 82. stav (7) i člana 82b. stav (2) ovog zakona Vlada Federacije će donijeti u roku od jedne godine od dana stupanja na snagu ovog zakona.“

#### **Član 75.**

Iza člana 221. dodaju se novi čl. 221a., 221b. i 221c. koji glase:

#### **Član 221a.**

##### **Primjena i rok za usklađivanje propisa**

- (1) Usklađivanje propisa iz člana 107. stav (4) ovog zakona izvršit će se u roku od šest mjeseci od dana stupanja na snagu ovog zakona.
- (2) Podzakonski akti iz člana 28b stav (4) i člana 54. stav (7) ovog zakona donijet će se u roku od šest mjeseci od dana stupanja na snagu ovog zakona.
- (3) Do donošenja propisa iz stava (1) ovog člana primjenjivat će se podzakonski propisi doneseni na osnovu zakona o vodama (Službene novine Federacije BiH“ broj 70/06), a koji nisu u suprotnosti sa ovim zakonom.

#### **Član 221b.**

##### **Rok za usklađivanje i donošenje odluka**

- (1) Nadležni organ iz člana 54. ovog zakona dužan je donijeti odnosno uskladiti postojeću odluku o odvodnji u roku od dvije godine od dana stupanja na snagu ovog zakona.
- (2) Nadležni organ iz člana 68. ovog zakona dužan je donijeti odnosno uskladiti postojeću odluku iz člana 68. ovog zakona u roku od tri godine od dana stupanja na snagu ovog zakona.

#### **Član 221c.**

##### **Rok važenja izdatih ovlaštenja**

Ovlaštenja izdata u skladu sa članom 120. stav (6) i 157. stav (2) ovog zakona prestaju da važe u roku od šest mjeseci od dana stupanja na snagu ovog zakona."

#### **Član 76.**

##### **Rok za usklađivanje kantonalnih propisa**

Kantonalni organi nadležni za vode dužni su uskladiti svoje kantonalne zakone u roku od šest mjeseci od dana stupanja na snagu ovog zakona.



## **Član 77.**

### **Stupanje na snagu**

Ovaj zakon stupa na snagu osmog dana od dana objavljivanja u "Službenim novinama Federacije BiH".